

Uunga siunnersuut: Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisaat

(Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Akissuteqaat

(Ineqarnermut, Attaveqaasersuutinut, Aatsitassanut, Inatsisit Atuutsinneqarnerannut Naligiissitaanermullu Naalakkersuisoq)

Aappassaanneerpeqarnera

Inuussutissarsiornermut Aatsitassanullu Ataatsimiititaliaq inatsisissatut siunnersuummik peqqissaartumik suliarinninnerannut Naalakkersuisut qutsavigaat.

145.943.572 koruunit aamma 35.452.315 koruunit, ilanngussat Naalakkersuisut tunniussaasa ilaanniittut, suut aningaasartarineraat paasissutissiissutigineqarnissaanik Ataatsimiititaliap Naalakkersuisut qinnuigai. Tamatuma saniatigut suliassamut siunnersuummi kallarneqartussamut aatsitassarsiorluni misissuinermit aningaasartuutit akilerneqarsimasut tassani pineqarpata, pisinnaatitsissummik pigisaqartut aningaasat taakkua Namminersorlutik Oqartussanit akileqqusinnaaneraat pillugu paasitinneqarnissat Ataatsimiititaliap kissaatigaa.

Aningaasat taaneqartut taakkua ukiuni 2016-2020, aatsitassarsiorluni misissuinermit aningaasartuutit pisinnaatitsissummik pigisaqartunit siunnersuummit kallarneqartussatut naatsorsuutigineqartariaqartunit (145.943.572 koruunit) aamma pisinnaatitsissummik pigisaqartunit siunnersuummit sunnerneqarnissaat (35.452.315 koruunit) ilimanartunit akilerneqarsimapput. Pisinnaatitsissutini pingasuni pisinnaatitsissummik pigisaqartut katillugit marluk tassani pineqarput.

Pisinnaatitsissummik pigisaqartunut uranimut inerteqquteqarnermit sunnerneqartunut taarsiissuteqarnermik imaluunniit allatut taarsiilluni akiliinissamut inatsimmi tunngavissamik siunnersuummi aalajangersaasoqanngilaq. Taamaalillutik Naalakkersuisut tunngavigaat, pisinnaatitsissummik pigisaqartut siunnersuutip piviusunngortinneqarnera tunngavigalugu piiaanissamut akuersissummik pissarsinnaassanngikkaluartut, pisinnaatitsissummik pigisaqartut aatsitassarsiorluni misissuinermit aningaasartuutit akilerneqartut taarserneqarnissaannik qinnuteqarsinnaanngitsut. Taarsiissutitalimmik arsaarinnissuteqarnissamut imaluunniit taarsiissutitalimmik arsaarinnissuteqarnerup malitsigisaanik taarsiilluni akiliinissamut siunnersuut inatsimmi tunngavissaliinngilaq. Pisinnaatitsissummik tunniussinissamik itigartitsineq pinngitsaaliissummik taarsiissutitalimmik arsaarinninnermik kinguneqartussatut naliliisoqassappat, siunnersuut aamma atuutsinneqassanngilaq. Taamaalilluni Namminersorlutik Oqartussat taarsiinissamik akisussaatinneqartussaannngitsut Naalakkersuisut isumaqarput. . Tamanna aamma siunnersuummut nassuiaatini allassimavoq.

Aammattaq Naalakkersuisut soq aatsitassarsiorluni misissuinermit aningaasartuutit pillugit paasissutissat siunnersuummut nassuiaatini allassimanissaat Naalakkersuisut naleqquttuusorisimannginneraat tunngavilersorneqarnissaa Ataatsimiititaliap kissaatigaa.

Naalackersuisut tamanna naleqquatsissimangilaat marlunnik pissuteqartumik: Siullermik aningaasartuutit akilerneqareersut taarserneqarnissaannut siunnersuummi tunngavissaliisoqanngilaq. Aappaattullu Naalackersuisut isumaat malillugu, pisinnaatitsissummik pigisaqartut pīaanissamut akuersissummik inatsisitigut piūmasaqaateqarsinnaanngillat. Inatsisissatut siunnersuutip ullumikkut oqallisigisatta saniatigut, pisinnaatitsissummik pigisaqartut uranimik pīaanissamik piūmasaqarsinnaanngitsut, akuersissutinut atugassarititaasuni immikkut ittuni allassimareerpoq.

Tamatuma saniatigut taakkua sumiiffiup pisinnaatitsissuteqarfiusup annertusitinnissaanik imaluunniit inissisimaffiata allanngortinnissaanik qinnuteqassappata, siunnersuutip pīaanissamut akuersissutit atuuttut qanoq sunniuteqarfīgissaneraī nassuiaqqullugu Ataatsimiititaliap Naalackersuisut qinnuigai.

Siunnersuut pīaanissamut akuersissutinut atuutereersunut atuutinngilaq, taamaattumillu taakkua sunnerneqartussaananik, aamma pisinnaatitsissutip allanngortinnissaa imaluunniit allilerneqarnissaa qinnutigineqassappat. Allilerinissaq imaluunniit allanngortitsinissaq qinnutigineqartoq pissusiviusuni tassaappat akuersissut nutaaq, aatsaat siunnersuut atuutissaaq.

Aammattaaq pīaanissamut akuersissutinik pioreersunik piginnittuusut sumiiffiup pisinnaatitsissuteqarfiusup iluani uranimik peqarnersoq misissuinissamik pisussaaffilerneqassanersut, taamaassimappallu tamatuma qanoq akeqarnissaa naatsorsuutigineqarnersoq nassuiaqqullugu Ataatsimiititaliap Naalackersuisut qinnuigai.

Inatsisissatut siunnersuummi allassimammatt tassani pīaanissamut akuersissutit atuutereersut pineqartunut – siunnersuut malillugu - ilaatinneqanngitsut, taakkua uranimik peqarnersoq misissuinissamik pisussaaffilerneqartussaanngillat.

Siunnersuut sanaartugassanut qaarsumi qaartiteriviusussanut sunniuteqassanersoq aammalu sanaartugassanut siunissami oqartussat piūmasaqaateqarneranni qinngornernik ulorianartunik akoqarnersoq misissuinissamik piūmasaqaateqartoqartassanersoq, taamaassimappallu tamanna qanoq aningaasartuuteqarnernik malitseqassanersoq, nassuiaqqullugu Ataatsimiititaliap Naalackersuisut qinnuigai.

Siunnersuut isumalluummi misissueqqaarnermut, aatsitassarsiorluni misissuinermut imaluunniit pīaanermut atatillugu aatsitassarsiorluni suliassanut taamaallaat atuuppoq. Inatsisissatut siunnersuummi § 1 innersuussutigineqarpoq.

Siunnersuut atuutilissappat taanna malillugu annikitsumik aatsitassarsiornissamut akuersissummik qinnuteqaat qanoq iliuuseqarfīgineqassanersoq nassuiaqqullugu Ataatsimiititaliap Naalackersuisut qinnuigai. Pingaartumik 100 ppm killissaliussaq qaangerneqarsimanersoq annikitsumik aatsitassarsiornissamut akuersissummik qinnuteqartup uppersarsaneraa imaluunniit Naalackersuisut misissuinerit pisariaqartut taakkua ingerlatissaneraat, aammalu misissuineq taamaattoq qanoq akeqassanersoq.

Inatsisissatut siunnersuummut nassuiaatini allassimasutut, inatsit annikitsumik aatsitassarsiornissamut akuersissutinut atuutinngilaq. Taamaattoq Naalackersuisut eqqumaffigeqqussavaat annikitsumik aatsitassarsiornissamut akuersissutinut tunngatillugu,

aatsitassanut ikummatissanullu inatsimmi § 33, imm. 1 naapertorlugu aatsitassanik qinngornernik ulorianartunik akulinnik pīaanissamik nalinginnaasumik inerteqquteqarneq atuutereermat.

Kiisalu siunnersuut akuersissummik peqarani aatsitassanik katersisarneq pīaasarnerlu pillugit aatsitassanut ikummatissanullu inatsimmut qanoq naapertuunnersoq Ataatsimiititaliap apeqqutigaa. Ujaqqanik pīnersaasiassanik katersinerup imaluunniit pīaanerup sumiiffinni 100 ppm sinnerlugu uranitaqartumi ingerlanneqannginnissaa Naalakkersuisut qanoq nakkutiginiarneraat, Naalakkersuisut nassuiassagaat Ataatsimiititaliap kissaatigaa.

Siunnersuummut nassuiaatit innersuussutigineqarput, tassani itisilerneqarpoq siunnersuut ujaqqanik pīnersaasiassanik katersinermut pīaanermullu atuutinngitsoq. Aatsitassanut ikummatissanullu inatsimmi § 45c, imm. 1-imi aatsitassanik qinngornernik ulorianartunik akulinnik katersinissaq pīaanissarlu nalinginnaasumik inerteqqutaareerpoq.

Ataatsimiititaliami amerlanerussuteqartut siunnersuutip akuerineqarnissaa inassutigaa.

Ataatsimiititaliami amerlanerussuteqartut siunnersuut maannakkut ilusimisut iluseqarluni akuerineqassasoq inassutigimmassuk Naalakkersuisut sinnerlugit nuannaarutigaa.

Naalakkersuisut taamatut oqaaseqarlutik siunnersuut aappassaanneernejartussanngortippaat.